



*Sabtu, 13 Agustus 2022*  
**Ogen: Hakim-hakim 20:15-16**



*"Tentara Si Jaluk"*



**T**ep-tep manusia si ijadiken Dibata, lit kerina kelebihan ras kekurangenna. Kelebihan ras kekurangen i bas biak bage pe kelebihan ras kekurangen secara pisik. Kerinana kelebihan ras kekurangen mabai manusia tetap ngataken bujur man Tuhan.

Salah sada kekurangen si ijumpai i bas diri sekalak manusia e me jaluk (kidal=kiri dari lahir). Kalak jaluk makeken tan kirina i bas erkegiatan erkiteken gegehen tan si arah kaus/kiri asangken tan si arah kemuhen/kananna.

Kondisi jaluk i bas sekalak jelma justru jadi keunikken man jelma e, contohna lima pemain bulu tangkis terbaik dunia justru jaluk/kidal (Flandy Limpele asal Indonesia, Caroline Marin asal Spanyol, Kim Dian asal China, Mathias Boe asal Denmark ras Kento Monoto asal Jepang); limana pemain bulu tangkis enda merekan sumbangan ras prestasi man negarana. I bas Pustaka Si Badia pe lit sekalak hakim se tergelar Ehud "the left-handed" si tangan kidal (Hakim-hakim 3:12-30). "*Kenca bage erlebuh bangsa Israel ku Tuhan, e maka iberekena sekalak mbebasken bangsa e, e me sekalak si jaluk, Ehud gelarna*"; bage pe bahan renungen i bas paksa tenengta i tulisken maka 700 tentara si jaluk i pilih guna erperang janah pitu ratusna ngasup erkalimbawang. Arah keterangan enda si gechap maka, kekurangen entah pe keunikken i bas dirinta e pe sada cara Dibata lako ncidahken kerna KuasaNa ras keleng ateNa nandangi kegeluhenta, maka kekurangen i bas diri e labo erbahan kita mela, putus asa, kecewa, merawa ras rendah diri sierbahanca kita jadi kalak si pesimis. Kekurangen/keunikken si lit njadiken kita sekalak jelma si ngasup ndatken segudang prestasi ras keberhasilan.

Tentera si jaluk alu buena pitu ratus justru ngasup make alat guna mbela bangsa Israel. Pandangan kalak mungkin aneh tapi justru keanehen e i jadikenna senjata lako berhasil i bas erperang.